

Du wääscht jo

Magret: Un, wie?

Lissel: Ach, wie?

Magret: He-a, ich hab de Ding getroffen.

Lissel: Ach, de Ding! Un? Was saachdern?

Magret: A ja, so halt. Wääscht jo.

Lissel: Ach so, a dann. Is aa immer s selwe, gell?

Magret: Jo. Wääscht jo. Mit soinere Fraa halt.

Lissel: Schun widder?

Magret: Jo, was willschden mache?

Lissel: A, do kannscht nix mache.

Magret: Wem net zu rode is, dem is aa net zu helfe.

Lissel: Saach ich aa immer.

Magret: Un mit de Kinner genauso.

Lissel: Wieso? Was issen do?

Magret: A ja, mit de Kinner halt. Du wääscht jo, wie s is.

Lissel: Jo, iwwerall s Gleiche, gell?

Magret: Des kannscht laut saache.
Lissel: Awwer bei dem isses schun – also –
odder net?

Magret: A doch, schun.
Lissel: Siehscht!

Magret: Un bei eich?
Lissel: Frooch net. Du wääscht jo.

Magret: Glaabscht des? Des hätt ich jo jetz net –
also – grad bei eich.
Lissel: Des hänn viele net – awwer – so isses halt.

Magret: He-a, do hinne kummt Moiner.
Nix fer ugut, awwer ich muss dann mol,
weggem Nachtesse, ne. Wääscht jo.
Lissel: Alla, awwer behalt s fer dich.
Magret: A jo, wääscht doch. Alla.

Karl: Was hot se dann gewollt, die Lissel?
Die hot so geguckt.
Magret: Was werd sen gewollt hawwe?
Du wääscht jo!
Karl: Ach so, a dann.

Bei uns is was los

He-a, ich kann eich saache, bei uns is was los – schlimmer wie in de Großstadt. Do denkscht, du ziehst in en Vorort, des is e ruhisch Gegend – Peifedeckel! Ich mään, ruhisch isses schun bei uns – uff de erschde Blick; awwer wann d hinner die Kulisse guckscht, do gehn der die Aache uff. Ich beowacht des jetz schun e ganzi Weil.

Vor e paar Johr im Herbscht hot s agfange. Do hot uff ämol e Audo mit Hamburger Kennzeiche bei uns in de Stroß gstanne. Jetz frooch ich eich: Was macht en Norddeitsche in unsre Siedlung? Der versteht doch kä Wort. Erscht hawwisch gedenkt, der werd sich vererrt hawwe, awwer dann is der immer widder kumme. Un dasses net so uffällt, hodder dauernd de Parkplatz gewechselt. Mol hoscht des Audo am Afang vun de Stroß gsehe, mol geggeniwwer vun s Meiers, dann widder am End, korz vor dem Wendehammer. Ich mään, wammer e reines Gewisse hot, dann kammer doch jeden Daach an de selwe Stell parke, odder net?

Wu ich des moincre Freundin, de Magret, verzeht hab, do saacht die: »S werd halt wuannerscht nix mehr frei gewese soi.« Wann ich so was heer! Also die wär kä Miss Marple worre.

Awwer ich hab uffgebasst. Jedes Wocheend war Ruh. Kä Hamburger Audo in de Stroß! Kaum war s Mondaach, hodder widder do geparkt. No war uns klar

– also de Lissel, de Hilde un mir – der hot e Verhältnis mit änere aus de Siedlung. Wann derre ihrn Mann in de Anilin is, besucht der die, un kurz vor Feierowend fährt er widder hääm. Des is doch logisch, odder? Die Hilde hot aa gsaat, des kann gar net annerscht soi.

Bloß die langweilich Magret hot widder gemäänt: »Wahrschoints schafft der in de Näh un parkt bloß do.« Also die hot wirklich vun nix e Ahnung.

Mir hänn uns dann uff die Lauer gelegt, awwer määnener, mir hädden den ämol gsehe? Wie vun Geischderhand hot pletzlich des Audo do gstanne un owends war s widder fort. Also wann äner nix zu verberge hot, do muss er doch net so häämlich du-e, odder?

Nooch eme halwe Johr war s dann rum. Sie schoint aa bei ihrn Mann gebliwwe zu soi. Mer hot jedenfalls nix gheert, dass jemand ausgezooche wär. Also mir hänn die Ding hinne am Weiher in Verdacht ghabt. Die hot nämlich e Weil in Hannover gewohnt un do reddden se jo Hochdeitsch. Awwer bewaise kannscht so was nadierlich nie.

S war grad widder e bissel Ruh oigekehrt, do geh ich änes Daachs uff de Markt oikaafe un wen seh ich in de Eisdiel hogge? Die Helga mit ihrn neie Freund. Do muss derre ihrn Mann geschäftlich fer e halb Johr ins Ausland un kaum hot dem soin Flieger s Fahrgstell oigeklappt, hot die schun en Neie. Un was hänn die zwää immer fer e Theater gemacht mit Schätzel hinne un Schätzel vorne. Awwer do kammer mol sehe: Alles nur Fassade!

Die Lissel hot gemäänt, so schnell deet mer net emol uffm Speed-Dating äner kennelerne. Die misst den schun vorher ghabt hawwe. Also ehrlich gsaat, grad vun de Helga hätt ich des nie gedenkt. Des hot mich so enttäuscht. Seither geh ich re bissel aus em Weg.

Die Lissel hot aa gsaat: »Was sollen en do die Leit vun em denke, wammer mit derre verzehlt. Die määnen jo, mer wär genauso.«

Blöß die Magret hot widder dumm gebabbelt. Sie hätt gheert, des wär de Helga ihrn Vadder. Die hätt Angscht allää in dem Haus un deswege deet der so lang do bleiwe, bis ihrn Mann widder kummt.

Also die konstruiert sich als was zurecht! Ich mään, der is gude zwanzisch Johr älter wie die Helga, awwer dass des de Vadder is, des glaabt doch kän Mensch. Des is widder typisch Magret. So gern wie ich se hab, awwer die blickt wirklich gar nix.

Genau wie bei derre Gschicht mit s Brechte ihrn Florian. Was hänn die fer e Gschiss gemacht mit dem Buu. Schun vun klää uff. So freundlich wär er un so hilfsbereit. Lauder gude Note deet er häämbringe. Ich hab s ball nimmi heere känne. Un was is debei rauskumme? Klaue dut er! Ich hab s mit ägene Aache gsehe. Awwer des will die Magret bis heit noch net glaawe. Un debei? Wu ich deletscht im Subbermarkt oikaafe war, steht der Florian an de Kass un redd als uff die Kassierer in oi. Na, ich bin dann weider geloffe, uff ämol seh ich den Buu an

de Sießigkeite. Der hot ganz schää abgeraamt. Drei Daffe Schokolad hodder rausgholt.

Ich hab noch gedenkt: »Do stimmt doch was net.«

Also geh ich em nooch an die Kass un tatsächlich drängt sich der Bankert durch die Schlang ganz nooch vorne, hebt die Schokolad hoch un geht naus, ohne zu bezahle. So uverfreore – do gheert schun was dezu. Un die Fraa an de Kass macht do mit. Die muss des doch gsehe hawwe! Ich deet wedde, die steckt mit dem unner änere Deck. Wie sollen des sunscht gewese soi? Noch kann ich s net bewaise, awwer irgendwann krigg ich raus, was do geloffe is.

Die Lissel hot gsaat, des hätt se nie vun dem gedenkt, wu der aus so re astännische Familie kummt. Awwer do kanschit heitzedaachs nimmi druff gehe.

Die Magret hot nadierlich gemäänt, der hätt bstimmt e Reklamation ghabt. Vielleicht wär die Schokolad schlecht gewese – in derre Hitz könnt des leicht bassiere – un er hätt se bloß umgedauscht. Also die verzappt en Bleedsinn s ganz Johr, des is furschbar.

Na ja, jetz is erscht emol Schluss mit denne dumme Sprich. Die Magret fahrt nämlich in Urlaub – drei Woche lang. Die Hilde, die Lissel un ich, mir känne uns des net leischde. Nää, net weggen Geld. Des hot en annere Grund.

De alt Fraa Hedderich is nämlich e Schal vum Grab geklaut worre. Sie behaupt zwar, die wär im Blummelade zum Oiplanze, awwer mir glaawen eher, dass derre ihrn Enkel die verkaaft hot.

Dann hot de Lohmeiers Rudi deletscht soin Grienabfall uff de Wertstoffhof gfare un seit dem Daach hot niemand mehr dem soi Fraa gsehe. S hääßt, die wär in Kur, awwer ob mer des glaawe kann? Wer guckt dann schun, was zwische denne Äscht liggt?

Außerdem sin bei s Schreifers schun zwää Woche die Rolllade hunne un käner wääß, warum.

Bevor des net alles uffgeklärt is, do kammer doch net fortfahre. Mer hot jo schließlich e Verantwortung fer soi Mitmensch. Un hinnenooch? Mer wääß, was do widder is. Bei uns is jo dauernd was los. Ich mäan, ich leb gern do, awwer wann d e bissel informiert soi willscht, do kummscht zu käm Urlaub un nix.